

17. oktober 2025

UKA2025/91

Inatsisissatut siunnersuutinik suliaqartarneq pillugu malitassiat atuuttut allanngortinneqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni inatsisissatut siunnersuutip nassuiaataani, nunat tamat akornanni pisussaaffinnut, nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersuummi inuit pisinanatitaaffiit aamma nunap inoqqaavisa pisinnaatitaaffiit tunngasunik nassuiaasiortoqartassalluni. Naalakkersuisut suleriaasiat nutaaq ulloq 1. januar 2026 atuutilissaaq.

(Inatsisartunut ilaasortaq Mariane Paviassen Jensen, Inuit Ataqatigiit)

Siumut siunnersuuteqartumut, Marianne Paviassen Jensen Inuit Ataqatigiinneersumut qujavog, isumaqarpugullu siunnersuut pingaaruteqartoq aamma inatsisiliortarnerput pillugu tunngaviummik inuit pisinnaatitaaffii pillugit annertusaasariaqarnitsinnik siunnersuut oqariartorpoq.

Naalagaaffinngornissamut namminiussuseqarnerunissatsinnillu ingerlanitsinni taamaallaat aningaasaqarneq akisussaaffinnillu tigusiinissaq pineqanngillat – assinganik pingaaruteqartigaluni inissisimapput inuiaqatigiittut pingaartitavut, taakkulu tunngavigalugit inatsisiliortarnerit ingerlanneqartarnissaat.

Inuit pisinnaatitaaffiit aamma nunat inoqqaavisa pisinnaatitaaffiit tunngassuteqartut tassaannaanngillat nunarsuarmioqatigiit akornanni pisussaaffilersorsimanerit, aamma apeqqutini tamakkunani pineqarput uagut inuiattut ilisarnaativut immikkuullarissuseqarnerpullu. Apeqqutit tamakku inatsisiliortarnerit erseqqissapput aamma innuttaasut ilisarisinnaassavaat.

Siumup siunnersuuteqartoq isumaqatigaa oqarmat, inatsisilik suliaqarneq ammasuussasoq, akisussaassuseqassasoq aamma inuiattut pingaartitatsinnut tappissasoq, minnerunngitsumillu naalagaaffinngoriartarnerput ilutigalugu kikkunitsinnik inatsisit ersersitsissasut. Innuttaasut takusinnaappassuk pisinnaatitaaffimminnik aallaaveqartumik inatsisiliorneq ingerlanneqartoq aammalu pisinnaatitaaffiit taakku inatsisiliortarnermi aallaavigineqartut, oqartussaaqataanitsinnut tatiginninneruneq pilissaaq, aamma maani inersuarmi aalajangersarneqartartut eqqarsaatigalugit.



Siumup maluginiarpaa Naalakkersuisut siunnersuummut ilanngullutik tapersiissut, aamma inatsisilioriaasitta nutarterneqarnissaanut piumassuseqartut. Tamanna iluarisimaarparput, aamma Naalakkersuisut oqariartuutaat tusaavarput, tassalu inuit pisinnaatitaaffii aamma nunat inoqqaavisa pisinnaatitaaffii inatsisiliornermi erseqqinnerulersillugit inissittalernissaat sulissutigerusummassuk.

Siumullu isumaqarpoq, sulinissaq tamanna teknikimut taamaallaat tunnganani, aammali ersersinneqassasoq, Nunatta nunarsuarmioqatigiinnut akisussaaffimminik ilanngulluni pingaartitsisoq pimoorussisorlu – siunissarpullu inuit ataqeqatigiinnerannik pisinnaatitaaffiinillu qammarneqarsimassasoq.

Taamak oqaaseqarluta siunnersuut tamakkiisumik taperserparput, aamma allannguutit januaarip aallaqqaataanni 2026 atuutsinneqalernissaat ilanngullugu. Tamanna pissusissamisoorpoq aamma alloriarnerusaaq pisariaqartoq – minnerunngitsumik naalagaaffinngornissatsinnut atatillugu aamma inuiaqatigiit tamanit peqataaffigineqartut qulakkeerneqarnissaanut.

Siunnersuut Inatsisinut Ataatsimiititaliamut ingerlateqqinneqassasoq innersuussutigaarput.

Qujanaq.

Erik Jensen

Siumut